

СЕПТЕМВРИЯ 7-ГО ДЕНЬ.

СЛУЖБА СЯТИТЕЛЮ ИОАННУ НОВГОРОДСКОМУ

НА ВЕЧЕРНИ

Блажен муж:

на Господи воззвах, стихиры, глас 2.

Подобен: Егда от древа:

Егда Божественный глас свыше услышав, / святителю Иоанне блаженне, / столп непоколебимый церкви, / и граду основание явился еси, / преславне, надежды еже на Бога народом не отпадати глагола еси: / обаче верою несумненно держимь, / радуясь вопиял еси Христу: / слава, Человеколюбче, Твоему смотрению.

Образ был еси святителем, блаженне, / о стаде Христове попечение неленостно стяжав: / великаго Новаграда похвала / и Российския земли утверждение, / и всея вселенная удобрение. / Темже сердцем и усты ты, святителю Иоанне, ублажаем, / и радующися вопием: / слава Божию еже к нам смотрению.

Духа Святаго обитель был еси, / духу плоть покорил еси, / вся козни искусителя поправ, / стоянии всенощными подвигом твоим мудре: / людем Российския земли / на сопостаты подаждь одоление, / молитвами твоими блаженне. / Тебе кланяемся и радующеся вопием: / слава Богу предивна ты Показавшему чудотворца, / человеком в наказание.

Слава, святого, глас 4:

Святителей образ, и веры утверждение, / Иоанне преблаженне, / и правило монахов, / не дал еси сна твоим очима, / во всенощных стояниях яко безплотен, / и в зрениих к Богу вежда твоя дремания, / дондеже глас Божественный услышал еси, / свободяюще град от пленения ратных, / и Богопорученное тебе стадо от расхищения. / Темже сошедшеся днесь, любовию ублажаем тя: / О служителю Единосущныя Троицы! / Не престай моляся о творящих верно святую память твою.

И ныне, предпразднества, глас 4:

Всечестное Твое Рождество, / Пресвятая Дево Чистая, / Ангелов множества на небеси, / и человеческий род на земли ублажаем, / яко Мати была еси Творца всех Христа Бога: / Того молящи о нас не престай, / молимся, иже на Тя по Бозе упование положших, / Богородице Всепетая, и Неискусобрачная.

Вход. Прокимен дне и чтения три.

На стиховне стихиры святого, глас 2.

Подобен: ДOME Евфрафов:

Дом Духа Святого, / и православия утверждение, / святителей похвало,
совершенный верою, / Иоанне прехвальне Христу Богу.

Стих: Священницы Твои облекутся в правду и преподобнии Твои
возрадуются.

Дом Премудрости Божия, / Еяже присно наслаждаемся, / славне, и веры
истинный учителю еси, блаженне, / ко Господу.

Стих: Блажен муж, бояйся Господа, в заповедех его восхощет зело.

Дом нескудныя благодати, / и град крепкий, и на враги победа, / возвыси рог
православных христиан, / молитвами твоими ко Господу.

Слава, глас 6:

Чистое житие твое похваляем, / пречестнейший отче Иоанне блаженне: /
сосуд избранный Божий, / муж желаний духовных, / и Духа Святого был еси
обиталище: / духи же нечистыя поправ, / и сих без вести сотворил еси. / И по
преставлении твоём к Богу, / яко жив являясь, / и о полезных наказуя. / И ныне
предстоя Святей Троице молися, / мир миру даровати, / и душам нашим велию
милость.

И ныне, предпразднства, глас 4:

Всемирная радость от праведных возсия нам, / от Иоакима и Анны Всепетая
Дева, / Яже премногия ради чистоты, / Храм Божий одушевленный бывает, / и
Едина воистинну Богородица познавается. / Тоя молитвами, Христе Боже, / мир
миру низпосли, / и душам нашим велию милость.

Тропарь, глас 8:

Днесь светло красуется славнейший великий Новград, / имея мощи твоя в
себе, святителю Иоанне, / яко солнечныя лучи испущающыя, / и подающыя
исцеления притекающим верою к тебе. / Молися Христу Богу, избавити град сей
невредимь от варварскаго пленения, / и междуусобныя брани, и огненнаго
запаления, / святителю богомудре и чудоносче, / небесный человек и земный
ангеле: / да сошедшеся любовию в память твою, светло празднуем, / в песнях и
пениих радующися, и Христа славяще, / тебе таковую благодать Даровавшего
исцелений, / и великому Новуграду заступление и утверждение.

Ин тропарь, глас 4:

Господи Боже наш, т/ врай присно с нами по Твоему смотрению, / не остави
милости Твоя от нас, / но молитвами святителя Твоего Иоанна / в мире устрои
живот наш.

Слава, и ныне, предпразднства:

От корене Иесеева и от чресл Давидовых, / Богоотроковица Мариам
раждается днесь нам: / радостию бо радуются всяческая и обновляются. /
Срадуйтеся купно, небо и земля, / восхвалите Ю отечествия языков. / Иоаким
веселится и Анна торжествует, зовущи: / неплоды раждает Богородицу, / и
Питательницу жизни нашея.

НА УТРЕНИ

По 1-м стихословии седален, глас 1:

Яко учитель и пастырь, / и видец чудодеев Божиих священо прославился еси, / и со ангелы Богу предстоиши: / тем днесь Божия Церковь чтит и прославляет преславную твою память: / слава Богу предивна Тя Показавшему во архиереех, / слава Укрепльшему Тя во искушениях, / и невредна Соблюдшу, / слава Прославльшему тя, Иоанне всеблажене. **Дважды.**

Слава, и ныне, предпразднства:

Рождшися преславно от неплодных ложесн, / от Девических чресл родила еси паче естества: / красен бо явльшися Стебель, / израстила еси міру Жизнь. / Сего ради силы небесныя вопиют Тебе, Богородице: / слава происхождению Твоему, Чистая, / слава Рождеству Твоему, / слава Девству Твоему, Мати Безневестая.

По 2-м стихословии седален, глас 4:

Великий Новград торжествует о Бозе достойно, / в память твою, отче Иоанне: / молитвами бо твоими спасаеми от искушений и бед, / и всякаго прещения находящаго, / и паки, святителю, / не престай моляся Христу Богу, / спастися душам нашим. **Дважды.**

Слава и ныне, предпразднства:

Лучи просияша всемірныя радости / Рождества Твоего, / Дево Мати Марие на земли, / и озариша мысли / любовью поющих Тя.

По полиелеи седален, глас 8:

Подобен: Повеленное:

Повеления Божия от юности сохранив, / отче Иоанне, / и во плоти сый Богу собеседник был еси, / и забрало граду, и церкви основание, / и Премудрости Божия служитель изряден, / святителей образ, и православия истинный учитель. / Тем молим тя, святе: / молися Спасу, мир вселенней даровати Богородицы ради, / и душам нашим велию милость. **Дважды.**

Слава, и ныне, предпразднства:

Да радуется небо, и земля да веселится, / Божие бо Небо, / на земли родися, Богоневестная сия, / от обетования. Неплоды Младенца питает Марию: / и радуется о Рождестве Иоаким: / Жезл, глаголя, родися мне, из Негоже / Цвет Христос прозябе из корене Давидова, / воистинну чудо преславно.

Степенна, глас 4. Антифон 1-й, ихже стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящий Сиона, / посрамится от Господа, / яко трава бо огнем / будете изсохше.

Слава: / Святым Духом / всяка душа живится, / и чистотою возвышается, / светлеется Троическим Единством священнотайне.

И ныне, тойже.

Прокимен, глас 4:

Честна пред Господем смерть преподобных Его.

Стих: Что воздам Господеви о всех, яже воздаде ми.

Всякое дыхание да хвалит Господа.

Евангелие Иоанна, зачало 36: Рече Господь Своим учеником: Аз есмь дверь:

По 50-м псалме

Слава: / Молитвами апостолов, / Милостиве, очисти / множества согрешений наших.

И ныне: / Молитвами Богородицы, / Милостиве, очисти / множества согрешений наших.

Таже, глас 6: Помилуй мя Боже / по велицей милости Твоей, / и по множеству щедрот Твоих / очисти беззаконие мое.

Стихира, Глас 6:

Чистое житие твое похваляем, / пречестнейший отче Иоанне блаженне: / сосуд избранный Божий, / муж желаний духовных, / и Духа Святаго был еси обителище: / духи же нечистыя поправ, / и сих без вести сотворил еси. / И по преставлении твоём к Богу, / яко жив являясь, / и о полезных наказуя. / И ныне предстоя Святей Троице молися, / мир миру даровати, / и душам нашим велию милость.

Канон предпраднства со ирмосом на 6: и святого на 8, глас 8.

Песнь 1

Ирмос: Воду прошед яко сушу / и египетскаго зла избежав, / израильтянин вопиаше: / Избавителю и Богу нашему поим.

Богозване яко воистинну милостив и кроток был еси, отче, и воистинну тих духом, и одесную престола Божия стояния сподобился еси, блаженне: и ныне на Небесех, тишину подаждь сердцу моему.

От молодых ногтей святителю Иоанне, вперился еси умом к Богу, и страсти телесныя зельным воздержанием увядил еси, всякими добродетельми украшаяся премудре.

Егда иерейский сан восприят, и Господня оправдания внимая умом, святителю Иоанне, и от среды молвы удаляясь, премудре, нечистоте не прикасался еси: тако, святителю, нечистая помышления отжени от сердца моего.

Богородичен: Православия был еси учитель истинный, и к Богородице велий молебник. Но и ныне, святителю, присно не престай, посещая чад твоих, яко к Богу дерзновение имей велие.

Катавасия: Крест начертав Моисей, впрямо жезлом Чермное пресече, / Израилю пешеходящу, / тоже обратно фараоновым колесницам ударив совокупи, / вопреки написа непобедимое оружие. / Тем Христу поим Богу нашему, / яко прославися.

Песнь 3.

Ирмос: Ты еси Утверждение, притекающих к Тебе Господи, / Ты еси Свет омраченных, / и поет Тя дух мой.

Яко убо солнце възде на востоце, ты же, святителю Иоанне, на севере на престоле седя великаго Новграда, възсиял еси светлыми деяньми, и люди вся просветил еси учении, и еретиков уста истинным словом заградил еси.

Благообразен обычай имей, и ко всем любовь Божественную притяжав, премудре Иоанне, варваром остроу притупи, святителю, и их до конца низложи.

Предочистив сердце твое молящуся тебе Богу о пользе людстей, слыша глас Божественный глаголющ ти еже о полезных: молитва бо твоя услышана бысть, якоже великаго о стаде твоем к Богу молебника, святителю Иоанне.

Богородичен: Совокупи, Пречистая, вся православныя, еже прославити Тя, Царице, Царя Христа Рождшую: далече же от нас отжени варварское негодование: рабу же Твоему подаждь слово, да возмогу воспети Твоя преславная чудеса.

Катавасия: Жезл во образ тайны приемлется, / прозябением бо предразсуждает священника, / неплодящей же прежде Церкви, / ныне процвете древо Креста, / в державу и утверждение.

Седален, глас 4.

Подобен: Скоро предвари:

Егда молящуся тебе в велицей церкви Премудрости Божия, преблаженне Иоанне, предъочищенный душою и телом: гласу же Божественному явленно тебе возгласившу, еже о чудеси Богородицы и о избавлении града, и о украшении Церкви Христовы, и прият от словес чуднаго онаго гласа истинных знамений, и чудес дарования, и Божественная учения изливаеши всем. Темже и с любовию, отче, празднуем святую память твою. **Дважды.**

Слава и ныне, предпразднства:

Дева Мариа и Богородица воистинну, яко облак света днесь возсия нам, и от праведнику происходит в славу нашу, не ктому Адам осуждается, и Ева от уз свободися. И сего ради зовем, вопиюще со дерзновением Единой Чистой: радость возвещает Рождество Твое всей вселенней.

Песнь 4.

Ирмос: Услышах, Господи, смотрения Твоего таинство, / разумех дела Твоя, / и прославих Твое Божество.

Законоположника велика, яко Моисеа ты и Давида, воистинну стяжавше, отче, чада твоя, яко чадолюбива отца, сынове Российстии ублажаем.

Многи убо церкви в славу Божию воздвигшу ти, святителю, показался еси сам храм Богу совершен и нескверен, чист душею и телом, премудре: темже и нас сотвори храмы Духа Пресвятаго, преблаженне.

Дне сын явился еси, в нощи же молящуся тебе Богу, в просвещение словес Божиих, отче Иоанне: враг же ненавидимый хотяше пострашити тя, не терпя себе надолзе досаждаема: но молитвою твоею связася вселукавый.

Богородичен: Владычице Богородице, устави церковное смущение, во благостоянии же учини во веки веков, и еретиков уста загради, возлюбивших огонь негасимый: от него же избави нас, рабов Твоих, и послужи неблаженно сподоби, Иже под летом бывшу, и от Отца безлетно возсиявшу, Богомати: Того бо нам родила еси.

Катавасия: Услышах Господи, / смотрения Твоего таинство, / разумех дела Твоя, / и прославих Твое Божество.

Песнь 5.

Ирмос: Утренюет дух мой к Тебе, Боже, / зане свет повеления Пришествия Твоео: / имиже убо озари ум наш, Владыко, / и настави на стезю жизни.

Честное Воскресение и Гроб Живоносный искренно узрел еси во Иерусалиме, дверем бо церковным о себе тебе отверзшимся мановением Святаго Духа, и сподобился еси Боговидения почерпсти, святителю Иоанне, искусителя же всячески победил еси: и ныне молися Христу Богу, еже победити вся иноплеменные и неверныя российскому воинству нашему.

Великаго Новаграда настольник и архиепископ был еси, и в дому Премудрости Божия яко финикс процвел еси, словесы благоплодными и непорочным житием наслаждая сердца, премудре и богодухновенне. И мы убо, чада твоя, молим тя блаженне, да молитвами твоими милость получим от Спаса Христа, и яко на чадолюбива отца надеемся.

Божия церковь жива и одушевлена бысть, святителю великий Иоанне, в церкви Божией простираяся во дни и в нощи, премудре, к премудрости Божии прилежа: служитель бо и собеседник Божий явственнейший был еси, и великаго Новграда и всея Российския земли удобрение, православным людем молитвами твоими здравие даруй, и на поганяя победы и одоления.

Богородичен: Церковь Тя Божию, и Палату одушевленну, и Ручку, в Нейже Манна и Жезл прозябший, и Гору несекомую, и вся яже о Тебе сбывшаяся пророчества, Богородице, служитель Твой великий святитель Иоанн славословяше, и молим Тя Едину, человеческого рода Отъемшую поношение.

Катавасия: **О** Треблаженное древо, / на немже распяся Христос, Царь и Господь. / Имже паде древом прельстивый, / тобою прельстився, / Богу пригвоздившуся плотию, / подающему мир душам нашим.

Песнь 6.

Ирмос: **К** могущему мя спасти Господу, / из глубины греховныя возопих, / и от тли возведе живот мой, / яко Человеколюбец.

К могущему Богу руце простирая иногда, и спасение обрел еси: водам же послужившим тебе чрез естество Божиим повелением, искуситель же посрамися и возрыда и до конца погибе, твоими молитвами, Иоанне святителю.

Богу тя прославльшу, якоже древле Моисеа, премудре Иоанне, представи бо тя пастыря и вождя, море житейское преводяща неблаженно люди, ихже Христос искупи Своею Кровию.

Самодержца ума страстей сотворив, яже царствовал еси яко изрядный победитель, и ратных дерзость покорил еси молением к Богу и к Пречистой Богоматери: ныне же способствуй верным твоим на противныя, Иоанне великий святителю.

Богородичен: **К**репость верным, и стена, и утверждение Ты еси, Пречистая, дадеся от праведных Иоакима и Анны, и по Гавриилову благовещению Бог родился из Тебе. Тобою, Пречистая, всем истекают лучшая, и на земли живущии к Небеси восходят.

Катавасия: **В**однаго зверя во утробе, / длани Иона крестовидно распростер, спасительную страсть проображаше яве. / Тем тридневен изшед, премірное воскресение прописаше, / плотию пригвожденнаго Христа Бога, / и тридневным воскресением мiр просвещашаго.

Кондак, глас 4.

Подобен: Вознесыйся:

Возвеселися явленно Честная Церковь Христова, / в память днесь приснословущаго святителя Иоанна, / от Великаго Новаграда возсиявшаго: / и всю страну удивившаго / преславными чудодеемии, / и всеми добродетельми украсившагося. / И по преставлении бо честное тело его обретесе нетленно, / источающее велия чудеса. / Темже зовем ему: / о всеблаженне! / Моли Христа Бога непрестанно о всех нас.

Икос: Празднуем светло днесь, к церкви текуще весь священный собор и монаси, и множество народа и все христоименитое стадо, в память отца нашего святителя Иоанна. Прославляем бо прославленнаго от Бога, егоже житию ангели удивишася, и ненаказаным в наказание бысть. И ограждение помышлением человеческим, и церкви основание. Непадающий бо столп Премудрости Божия, и великаго Новаграда стена и утверждение, и всея Российския земли удобрение, и вселенную удивившаго преславными чудодеемии, и всеми добродетельми украсившагося. Темже по достоянию блажим его, молит бо Христа о всех нас.

Песнь 7

Ирмос: Халдейския пещи всепагубную силу угасивше, / образом Ангела снизшедшаго, / **Зиждителю юноши** зываху: / **благословен еси и хвальный, Боже отец наших.**

Изнемогше иногда людие, оружия противных видяще: ты же тогда, Иоанне блаженне, ярость на грех вооружил еси, на молитву обратився к Милостивому Богу, и услышана бысть молитва твоя, и люди научил еси зывати: благословен Бог отец наших. **Дважды.**

Не сени убо послужил еси, но новей благодати и истине: закон бо Богописанен внутрь скрижали сердца твоего от Бога прием, святителю Иоанне пребогате. Темже закон нам Полагающему научил еси зывати: благословен Бог отец наших.

Богородичен: Во свете Господни ходяще, приидите воспоем Божественную Дверь, Царя царствующим Марию Чистую Богородицу, яко воистинну Надежду душ наших, зовущим: благословен Бог отец наших.

Катавасия: Безумное веление мучителя / злочестиваго люди поколеба, / дышущее презрение и злохуление богомерзкое: / **обаче три отроки** не устраши ярость зверская, / **ни огонь снедаяй,** но противодышущу росоносному Духу, / **со огнем** суще пояху: / **препетыи отцев и нас Боже,** благословен еси.

Песнь 8

Ирмос: На горе святей прославльшася, / и в купине огнем Моисеови тайну явльшаго, / Господа пойти и превозносите во вся веки.

С небесными чинми водворяся во дворех Господних, во граде Живаго Бога, святителю Иоане равноангельный, всенощными стоянии вопил еси во бдениих: хвалите и превозносите Его во веки.

Днесь светло празднует великий Новград память твою, красуется житием твоим предивным, Иоанне святителю. Не помяни сорешений чад твоих, отче: но яко чадолюбивый отец на милость обратися, моля Милостиваго Бога, Емуже поем: хвалите и превозносите Его во веки.

Храм священная душа твоя показася Божий, в нейже Отец и Сын и Святой Дух паче естества вселися, ты же, святителю, поганых нахождения отжени от достояния твоего. Православным людем твоим мир и здравие даруй, зовущим: хвалите, пойте и превозносите Его во веки.

Богородичен: Поистинне великим даром от Бога почтен быв, святителю Иоанне, яко сподобился еси послужити чудеси Святыя Богородицы, предивному Ея Знамению. Молитва бо твоя поспешествуема к Богу и к Пречистой Его Богоматере: поистине бо молитва праведнаго поспешествуема.

Катавасия: Благословите отроцы, / Троицы равночисленнии, / Содетеля Отца Бога, пойте снизшедшее Слово, / и огонь в росу претворшее, / и превозносите всем жизнь Подавающаго, / Духа Всесвятаго, во веки.

Песнь 9

Ирмос: Ужасеся о Сем небо, / и земли удивишася концы, / яко Бог явися человеком плотски, / и чрево Твое бысть пространнейшее небес. / Тем Тя Богородицу, / ангелов и человек чиноначалия величают.

Удивил еи человеки в животе твоём, предивный Иоанне, и по преставлении твоём к Богу, выше обычая вся чудеса совершишася в тебе, Христу ты тако прославльшу, яко истинна служителя Своего. Мы же ты яко крепка, святе, помощника во бранех, ублажаем.

Мир церквам подаждь, святителю, твоими молитвами, и хоругви православной помощь на враги вся противная, и рог Российския земли вознеси блаженне, предстоя Престолу Святыя Троицы: и от нас неотступен буди, неотступный к Богу молитвенниче: темже ты ублажаем.

Малое сие и смиренное хваление приими, святителю, от недостойных устен и мерзкаго моего языка, и от сердца нечиста: ты бо, великий святителю Иоанне, преочищенный душею и телом, паче солнечных луч облистал еси Божия заповеди совершив, и к Свету Невеченему преставился еси. Верно ты чтущим, молися, подати оставление грехов, Иоанне блаженне.

Богородичен: Святая Блаженная Мати Божия, поющыя Тя любовию спаси, искушений молву разоряючи, милостивно яко Бога рождши: вся елика хочеши, тврйти можеши Дево. Темже Тя величаем.

Катавасия: Таин еси, Богородице, рай, / невозделанно возрастивший Христа, / имже Крестное живоносное на земли насадися древо. / Тем ныне возносиму, покланяющесе ему, / Тя величаем.

Светилен святого:

От Света Трисиянаго глас услышал еси Божественный, святителю Иоанне, и Троицу прославил еси во Единице, и Единицу в Троице, и люди такожде научил еси, и просветил еси мирския концы твоим учением. Темже ты достойно почитаем, творяще честную память твою. **Дважды.**

Слава, и ныне, предпраздства:

Адам обновися и Ева возвеличися: пророцы со апостолы ликуйте и праведными: общая бо радость возсия, ангелов же и человеков, от праведных днесь, Иоакима и Анны, Богородица Мариа.

На хвалитех стихиры святого, глас 2.

Подобен: ДOME Евфрафов:

Дом Духа Святого, / и православия утверждение, / святителей похвало, / совершенный верою, / Иоанне прехвальне Христу Богу.

Дом Премудрости Божия, / Еяже присно наслаждаемся, славне, / и веры истинный учителю еси, блаженне, / ко Господу.

Дом нескудныя благодати, / и град крепкий, и на враги победа, / возвыси рог православных христиан, / молитвами твоими ко Господу.

Слава, глас 6:

Чистое житие твое похваляем, / пречестнейший отче Иоанне блаженне: / сосуд избранный Божий, / муж желаний духовных, / и Духа Святого был еси обителище: / духи же нечистыя поправ, / и сих без вести сотворил еси. / И по преставлении твоём к Богу, / яко жив являясь, / и о полезных наказуя. / И ныне предстоя Святей Троице молися, / мир миру даровати, / и душам нашим велию милость.

И ныне, предпраздства, глас 4:

Всемирная радость от праведных возсия нам, / от Иоакима и Анны Всепетая Дева, / Яже премногия ради чистоты, / Храм Божий одушевленный бывает, / и Едина воистинну Богородица познавается. / Тоя молитвами, Христе Боже, / мир миру низпосли, / и душам нашим велию милость.

Славословие великое и отпуст.

На Литургии

Блаженны от канона, песни 3-я и 6-я.

- 1.** Яко убо солнце възыде на востоце, ты же, святителю Иоанне, на севере на престоле седя великаго Новграда, возсиял еси светлыми деяньми, и люди вся просветил еси учении, и еретиков уста истинным словом заградил еси.
- 2.** Благообразен обычай имея, и ко всем любовь Божественную притяжав, премудре Иоанне, варваром остроу притупи, святителю, и их до конца низложи.
- 3.** Предочистив сердце твое молящуся тебе Богу о пользе людстей, слыша глас Божественный глаголющ ти еже о полезных: молитва бо твоя услышана бысть, якоже великаго о стаде твоём к Богу молебника, святителю Иоанне.
- 4.** Совокупи, Пречистая, вся православныя, еже прославити Тя, Царице, Царя Христа Рождшую: далече же от нас отжени варварское негодование: рабу же Твоему подаждь слово, да возмогу воспети Твоя преславная чудеса.
- 5.** К могущему Богу руце простирая иногда, и спасение обрел еси: водам же послужившим тебе чрез естество Божиим повелением, искуситель же посрамися и възрыда и до конца погиге, твоими молитвами, Иоанне святителю.
- 6.** Богу тя прославльшу, якоже древле Моисеа, премудре Иоанне, представи бо тя пастыря и вождя, море житейское преводяща неблазненно люди, ихже Христос искупи Своею Кровию.
- 7.** Самодержца ума страстей сотворив, яже царствовал еси яко изрядный победитель, и ратных дерзость покорил еси молением к Богу и к Пречистой Богоматери: ныне же способствуй верным твоим на противныя, Иоанне великий святителю.
- 8.** Крепость верным, и стена, и утверждение Ты еси, Пречистая, дадеся от праведных Иоакима и Анны, и по Гавриилову благовещению Бог родися из Тебе. Тобою, Пречистая, всем истекают лучшая, и на земли живущии к Небеси восходят.

Тропары,

Святаго, Глас 8:

Днесь светло красуется славнейший великий Новград, / имея мощи твоя в себе, святителю Иоанне, / яко солнечныя лучи испущающыя, / и подающыя исцеления притекающим верою к тебе. / Молися Христу Богу, избавити град сей невредимь от варварскаго пленения, / и междуусобныя брани, и огненнаго запаления, / святителю богомудре и чудоносче, / небесный человеце и земный ангеле: / да сошедшеся любовию в память твою, светло празднуем, / в песнях и пении радующися, и Христа славяще, / тебе таковую благодать Даровавшаго исцелений, / и великому Новуграду заступление и утверждение.

Предпраздства, Глас 4:

От корене Иесеева и от чресл Давидовых, / Богоотроковица Мариам раждается днесь нам: / радостию бо радуются всяческая и обновляются. / Срадуйтеся купно, небо и земля, / восхвалите Ю отечествия языков. / Иоаким веселится и Анна торжествует, зовущи: / неплоды раждает Богородицу, / и Питательницу жизни нашея.

Кондак Святаго, глас 4.

Подобен: Вознесыйся:

Возвеселися явленно Честная Церковь Христова, / в память днесь приснословущаго святителя Иоанна, / от Великаго Новаграда возсиявшаго: / и всю страну удивившаго / преславными чудодеянии, / и всеми добродетельми украсившагося. / И по преставлении бо честное тело его обретется нетленно, / источающее велия чудеса. / Темже зовем ему: / о всеблаженне! / Моли Христа Бога непрестанно о всех нас.

Прокимен, глас 4:

Честна пред Господем смерть преподобных Его.

Стих: Что воздам Господеви о всех, яже воздаде ми.

Апостол к Галатам, зачало 213.

Аллилуя, глас 6: Блажен муж, бояйся Господа, в заповедех Его восхощет зело.

Стих: Сильно на земли будет семя его.

Евангелие Иоанна, зачало 36:

Причастен: В память вечную:

